

ԻՏՏԼԻԱՅԻ ՀԱՅՈՑ ՀՈՎՎՈՒԹՅՈՒՆՈՒՄ

ԸՆԴՈՒՆԵԼՈՒԹՅՈՒՆ ՄԻԼԱՆԻ ՀԱՅ ՀԱՄԱՅՆՔՈՒՄ

Սույն թվականի մայիսի 8-ին Բտալիայում պաշտոնական այցելությամբ գտնվող Իրանի Իսլամական Հանրապետության նախկին նախագահ Այաթոլլահ Մուհամմադ Խաթամին հյուրընկալվեց Բտալիո հայ համայնքի կողմից՝ գլխավորությամբ Բտալիո հայոց հոգևոր հովիվ Ս. Առեն վարդապետ Շահենյանի: Հանդիպումը տեղի ունեցավ Միլանի Հայ Տանը, որին ներկա էին նաև Բտալիայում ՀՀ արտակարգ և լիազոր դեսպան տիար Ռուբեն Շուգարյանը, Բտալիայում և Վատիկանում Իրանի Իսլամական Հանրապետության դեսպանը, Միլանի քաղաքապետարանի ներկայացուցիչը, Բտալիո հայոց միության և հայ միութենական տարբեր հաստատությունների ներկայացուցիչներ, ովքեր իրենց ողջույնի խոսքերն ուղղեցին Այաթոլլահ Մուհամմադ Խաթամին:

Բտալիո հայոց հոգևոր հովիվ Ս. Առեն վարդապետը, հանուն համայնքի անդամների բարի գալուստ մաղթելով և այցելության համար շնորհակալություն հայտնելով Այաթոլլահ Մուհամմադ Խաթամին, կարևորեց Իրանի և հայ ժողովուրդների բարեկամության ամրապնդմանն ի խնդիր նրա ծավալած գործունեությունը և Մուհամմադ Խաթամին փոխանցեց Ն.Ս.Օ.Տ.Տ. Գարեգին Բ Ամենայն Հայոց Հայրապետի բարեմաղթանքներն ու ջերմ ողջույնները:

Հանդիպման ավարտին Այաթոլլահ Մուհամմադ Խաթամին իր շնորհակալական խոսքում անդրադառնալով երկու ժողովուրդների դարավոր բարեկամությանը՝ մասնավորապես շեշտեց, որ «քրիստոնյա հայ ժողովուրդը, միշտ հավատարիմ մնալով իր ազգին ու իր Եկեղեցուն, օրինապահ քաղաքացի է եղել աշխարհի տարբեր երկրներում, որի վառ ապացույցն է և Իրանի հայ համայնքը»:

ՀԱՅՐԱՊԵՏԱԿԱՆ ՕՐՀՆՈՒԹՅԱՆ ԳՐԻ ԵՎ «Ս. ՆԵՐՍԵՍ ՇՆՈՐՀԱԼԻ» ՇՔԱՆՇԱՆՆԵՐԻ ՀԱՆՁՆՈՒՄ ՄԻԼԱՆԻ ՍՐԲՈՑ ՔԱՌԱՍՈՒՆ ՄԱՆԿԱՆՑ ԵԿԵՂԵՑՈՒՄ

(Միլան, 13 մայիսի 2007 թ.)

Սույն թվականի մայիսի 13-ը Բտալիո հայ համայնքում նշանավորվեց գեղեցիկ իրադարձությամբ:

Միլանի Սրբոց Քառասուն Մանկանց եկեղեցում, հրնթացս Սուրբ Պատարագի, որին ներկա էին նաև Բտալիայում ՀՀ արտակարգ և լիազոր դեսպան տիար Ռուբեն Շուգարյանը, Վենետիկի Մխիթարյան միաբանության ներկայացուցիչ Հայր Վահան Օհանյանը, Մայր Աթոռ Ս. Էջմիածնի միաբան Ս. Մուշեղ աբեղա Բաբայանը, Բտալիո հայոց հոգևոր հովիվ Ս. Առեն վարդապետ Շահենյանը, տիկին Սոնա Իբիշյանին հանձնեց Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի Հայրապետական Օրհնության գիրը, իսկ տիկին Ջինա Սերապյանին և տիկին Մարի Մենդիկյանին՝ երկարամյա ազգանվեր ու նվիրյալ գործունեության համար Հայ Առաքելական Եկեղեցու «Ս. Ներ-

սես Շնորհալի» շքանշաններ՝ ի պայծառություն և ի բարօրություն Հայ Եկեղեցու և Իտալիո հայ համայնքի:

Ինչպես հոգեշնորհ Հայր Սուրբն իր քարոզի մեջ նշեց, պատահական չէր ընտրված օրը, որն, ըստ Իտալիո պետական օրացույցի, Մայրերի տոնն է, քանի որ «հավատավոր այս տիկնայք, Աստվածամոր օրինակին հետևելով, իրենց եկեղեցանվեր գործունեության մեջ մայրական գործով ու նվիրում են դրել»:

Հավարտ Ս. Պատարագի սրբազան արարողության, եկեղեցու «Մարթա Դիարբեքիյան» սրահում տեղի ունեցած մեծարման միջոցառմանը մեծագնիվ տիկնանց ազգասեր ու եկեղեցասեր նվիրյալ գործունեությանը իրենց գնահատանքի խոսքերն ուղղեցին դեսպան տիար Ռուբեն Շուգարյանը և Միլանի համայնքի հոգաբարձուների խորհրդի ատենապետ տիար Սարո Խուդավերդյանը:

Միջոցառումն իրենց երգակցությամբ զարդարեց նաև եկեղեցու «Նորահրաշ» դպրաց դասը:

Տ. ԱՌԵՆ ՎԱՐԴԱՊԵՏ ՇԱՀԵՆՅԱՆԻ ԴՈԿՏՈՐԱԿԱՆ ԹԵԶԻ ՊԱՇՏՊԱՆՈՒԹՅՈՒՆԸ ՀՌՈՄՈՒՄ

(Հոռմ, 23 մայիսի 2007 թ.)

Սույն թվականի մայիսի 22-ին Հոռմի Պապական Արևելյան Ինստիտուտում տեղի ունեցավ Իտալիո հայոց հոգևոր հովիվ Տ. Առեն վարդապետ Շահենյանի դոկտորական թեզի պաշտպանությունը:

Հոգեշնորհ Հայր Սուրբը պաշտպանության էր ներկայացրել «Հայ Առաքելական Եկեղեցու ժամերգությունները Բյուզանդական Եկեղեցու ժամերգությունների հետ գուգահեռում» թեզը, որի գիտական ղեկավարն էր Հայր Լևոն-Պողոս Զեքիյանը: Ընդդիմախոսներն էին՝ բյուզանդական ծեսի մասնագետ պրոֆեսոր Յակով Կուլիչը և արևելյան ծեսի մասնագետ պրոֆեսոր Հաուքս Տիփլիս Ստիվենը: Քննիչ հանձնաժողովի նախագահն էր ծիսագիտության ֆակուլտետի ղեկան Էդուարդո Ֆարուջան:

Պաշտպանությանը ներկա էին Իտալիայում ՀՀ արտակարգ և լիազոր դեսպան տիար Ռուբեն Շուգարյանը, Կաթոլիկ Եկեղեցու Միջեկեղեցական հարաբերությունների կենտրոնի ներկայացուցիչ մոնսիյոր Յոհաննես Բոնինի, համալսարանական ուսանողներ և Իտալիո հայ համայնքի անդամներ:

Հետ պաշտպանության հանձնաժողովի նախագահը հայտնեց, որ աշխատանքը գնահատվում է «զերազանց» և առաջիկայում պետք է հրատարակվի: Հոգեշնորհ Հայր Սուրբին շնորհվեց Արևելյան Եկեղեցագիտության դոկտորի աստիճան:

ԴԻՎԱՆ ԻՏԱԼԻՈ ՀՈԳԵՎՈՐ ՀՈՎՎՈՒԹՅԱՆ